




Քրիստոս յարեալ ի մեռելոց.
Օրհնեալ է յարութիւնը Քրիստոսի



**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՊԱՏԳԱՍԸ
ՄԵՐ ՏԵՐ ՀԻՍՈՒՄ ՔՐԻՍՏՈՍԻ ՍՈՒՐԲ ՀԱՐՈՒԹՅԱՆ ՏՈՆԻ ԱՌԻԹՈՎ**

(Երեւանի Սուրբ Գրիգոր Լուսավորիչ մայր եկեղեցի,
17 ապրիլի, 2022 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

«Ուրախացան ազգք մարդկան, յորժամ
լուան զՔո յարութիւնդ»

(Ժամագիրք):

Սիրելի՛ հավատաւոր զավակներ,

Սուրբ Հարության հրաշափառ տոնին քրիստոնյա ողջ աշխարհը վերստին փառաբանում է հարուցյալ Փրկչին, Որը խաչվեց եւ հարություն առավ մարդկանց մեղքերի քավութեան համար՝ մարդկութեանը պարգեւելով շարշարանքներից վեր հառնելու ուժը եւ հավիտենական կյանքը ժառանգելու շնորհը: Տիրոջ Հարութեամբ համախմբվեցին հուսալքված ու շփոթահար առաքյալները եւ Հարության բերկրութիւնն ու մխիթարութիւնն իրենց սրտում՝ Քրիստոսի կենարար վարդապետութիւնը տարածեցին աշխարհում եւ տերունապատվեր սիրո պատգամը հաստատեցին հավատացյալների հոգիներում:

Այսօր մենք եւ ազգիս աշխարհասփյուռ հավատաւոր զավակները, համախմբված եկեղեցիներում Վերնատանը հավաքված առաքյալների պես, զգում ենք Տիրոջ օրհնաբեր ներկայութիւնը, յուղաբեր կանանց հետ տեսնում թափուր գերեզմանը, լսում Հարության հրեշտակաձայն ավետիսը. «Այստեղ չէ, այլ հարութիւն առավ»:

Քրիստոսի Հարության տոնը մարդու հանդեպ աստվածային անսահման սիրո, մեղքի ու մահվան հանդեպ հաղթանակի տոնն է: Փրկչի

սերը թեեւ հանդիպեց ատելության ու թշնամանքի, սակայն Տերը երբեք չտարակուսեց եւ չընկրկեց: Մարդկանց նկատմամբ Նրա հոգատարությունը թեեւ բախվեց մերժումի, Նրա բերած ճշմարտությունը հակադարձվեց կեղծիքով, բայց Քրիստոս իրագործեց Իր առաքելությունը՝ հանուն մարդկության փրկության, եւ հարություն առնելով հաշտություն հաստատեց աշխարհի եւ Աստծու միջեւ: Արդարեւ, հարությունն այնտեղ է, որտեղ տերունավանդ սերն է հաղթանակում: Հարության փրկարար շնորհով զորանում են հավատացյալ անձերը եւ արժանի դառնում հավիտենական կյանքի: Հարությունը կենդանություն է բերում մեղքերով ծանրաբեռնված հոգիներին եւ մարդու ընթացքն ամուր պահում հույսի, սիրո եւ արդարության մեջ:

Քրիստոսի փրկագործությամբ արշալույսված դարերի հոլովույթում հարության հավատն ու շնորհը վերափոխել են անձերի ու ժողովուրդների, գոտեպնդել պատուհասների ու փորձությունների մեջ, զորություն պարգեւել՝ հաղթահարելու խաչելությունները, վեր հանելու գողգոթաներից եւ հաղթանակած քայլելու հարուցյալ կյանքի ճանապարհով: Այս ճշմարտությամբ ներշնչված է Սուրբ Ներսես Շնորհալի Հայրապետն օրհնաբանում Տիրոջ հրաշափառ Հարությունը՝ ասելով. «Ուրախացան ազգք մարդկան, յորժամ լուան զՔո յարութիւնդ»:

Սիրելի՛ բարեպաշտ հավատացյալներ, այսօր մարդկության կյանքն ալեկոծված է պառակտումներով, հակառակություններով, ազգամիջյան ատելության կորստաբեր ընթացքներով: Մենք տեսնում ենք, թե ինչպիսի վտանգների մեջ է աշխարհը ծավալվող քաղաքական զարգացումներով, որոնք հանգեցնում են միջպետական, տնտեսական եւ սոցիալական լրջագույն խնդիրների, խաթարում են երկրների եւ ժողովուրդների ներդաշնակ համակեցությունը: Աղոթենք, որ փոխհասկացողության եւ համերաշխության ոգին առավել զորանա մարդկանց մեջ, եւ խաղաղությունը տիրի ողջ աշխարհում, հատկապես այս օրերին՝ Ռուսաստանի Դաշնության եւ Ուկրաինայի եղբայր ժողովուրդների կյանքում: Թող Աստծու առաջնորդությամբ մարդկության կյանքում շուտափույթ հանգուցալուծում գտնեն բոլոր բարդ ու մտահոգիչ իրավիճակները՝ զերծ պահելու աշխարհը նոր աղետներից: Մեր Տերն այսօր էլ մարդկությանը տալիս է խաղաղության, եղբայրսիրության պատգամները եւ կոչում ապրելու աստվածապաշտությամբ ու մարդասիրությամբ: Միայն հարուցյալ ընթացքով, Քրիստոսի պատվիրանների համաձայն ապրելով կարող ենք

նոր կյանք արարել, որպեսզի ըստ առաքյալի հորդորի՝ «ինչպես որ Քրիստոս մեռելներից հարուժյուն առավ Հոր փառքով, նույնպես եւ մենք քայլենք նոր կյանքով» (Հռոմ. 2. 4):

Սիրելի՛ բարեպաշտ հավատացյալներ, Սուրբ Հարության ավետիսն այսօր առանձնակի մխիթարություն ու սփոփանք է բերում համայն մեր ժողովրդին, ի մասնավորի՝ պատերազմի արհավիրքներ ապրած մեր եղբայրներին ու քույրերին, որոնք այս պահին էլ վշտերի, նեղությունների մեջ են, անկայուն խաղաղության ու անապահովության պայմաններում: Հատկապես այս դժվարին ժամանակներում մեր կյանքը հավատքի եւ հավատո գործոց կարիքն ունի, որպեսզի հարատեւի հարության ուրախության մեջ եւ բարեգարգվի նորանոր իրագործումներով ու հայրենաշեն ձեռքբերումներով: Ազգային մեր անդաստանում հարուցյալ կյանքը նաեւ նշանակում է ողջախոհություն, անկախ քաղաքական հայացքներից ու տարակարծություններից՝ առ հայրենին հավատարմություն եւ ազգին անսակարկ նվիրում: Այս ոգով մեր կյանքից պիտի մերժենք անտարբերությունը, անհանդուրժելի, աղետաբեր հարմարվողականությունն ու հզորություն, միաբանություն ու առաջընթաց ապահովենք աշխարհասփյուռ մեր ժողովրդին եւ շեն ու բարօր ապագա՝ սերունդներին:

Ամենքս այսօր մտահոգ ենք մեր երկրի, մեր պետականության անվտանգության խնդիրներով, արտաքին մարտահրավերներով, ներհասարակական ու ներքաղաքական անհանգստություններով ու լարվածությամբ: Մտահոգ ենք մեր հայրենյաց սրբազան մասունքի՝ Արցախի բարդ իրավիճակով, որի նկատմամբ տակավին շարունակվում են սադրանքներն ու ոտնձգությունները:

Սիրելի՛ արցախցիներ, Մենք քաջ գիտենք ձեր հերոսական ոգին, ձեզ հատուկ արիությունն ու փորձություններին դիմակայելու հաստատակամությունը: Վստահ ենք՝ դուք չեք ընկճվելու դժվարությունների հանդիման եւ շենացնելու եք ձեր հարազատ բնօրրանը՝ առ Աստված ապավինությամբ վառ պահելով հույսն ու հավատը, որ մարդասիրությունն ու արդարությունը պիտի հաղթեն, որ պիտի ծագի Արցախի ազատ ու անկախ ապրելու իրավունքի ճանաչման լուսավոր առավոտը:

Սիրելի՛ բարեպաշտ ժողովուրդ, ազգովի զորակից լինենք ծանր փորձությունների միջով անցնող Հայաստան ու Արցախ մեր հայրենիքին, նեցուկ դառնանք կարիքի մեջ գտնվող մեր ազգակիցներին եւ գոտեպնդված հարության հույսով՝ նվիրական մեր երկիրը դարձնենք հրաշափառ





հարուստ իրական վկայարան: Հայրապետիս հայցն է առ հարուցյալ Տերը, որ ազգս հայոց տեսնի իր կրած տառապանքների վարձքը եւ կերտի սրբազան հայրենիքի վերածնունդը:

Մաղթանաց այս աղոթքը Մեր շուրթերին եւ «Քրիստոս յարեալ ի մեռելոց» ավետիսով եղբայրական Մեր ողջունն ենք բերում մեր Սուրբ Եկեղեցու նվիրապետական Աթոռների գահակալներին՝ Ն. Ս. Օ. Տ. Տ. Արամ Ա. Մեծի Տանն Կիլիկիո Կաթողիկոսին, Երուսաղեմի Հայոց Պատրիարք Ամենապատիվ Տ. Նուրհան արքեպիսկոպոս Մանուկյանին, Կոստանդնուպոլսի Հայոց Պատրիարք Ամենապատիվ Տ. Սահակ արքեպիսկոպոս Մաշալյանին, քույր Եկեղեցիների Պետերին՝ հայցելով հարուցյալ Փրկչի երկնառաք օրհնությունն ու օգնականությունը եւ գահակալության արեւշատ ու արդյունավոր տարիներ: Հայրապետական Մեր սերն ու բարեմաղթանքներն ենք հղում մեր Սուրբ Եկեղեցու ողջ հոգեւոր դասին եւ համայն հավատավոր Մեր ժողովրդին ի հայրենիս եւ ի սփյուռս:

Զատկական այս լուսապայծառ առավոտ Մեր աղոթքն ենք բարձրացնում առ Աստված եւ խնդրում, որ մեր Փրկիչը՝ Հիսուս Քրիստոս, իր Հարուստ շնորհները հեղի մարդկության կյանքին, իր Սուրբ Աջի ներքո պահպանի մեր հայրենիքը, աշխարհասփյուռ մեր ժողովրդին՝ պարգեւելով խաղաղություն, բարօրություն ու ապահովություն: Թող հարուստ կենարար խորհրդով զորացյալ ազգս հայոց իրականության առաջնորդի նախնյաց եւ մեր նվիրական իղձերն ու տեսիլքները՝ ի փառս մեր երկրի եւ ի հավետ պայծառություն մեր ժողովրդի: Տիրոջ սերը, խնամքը եւ ողորմությունը թող հովանի լինեն ազգիս ու հայրենյաց, այսօր եւ միշտ եւ հավիտյան. ամեն:

Քրիստոս յարեալ ի մեռելոց,
Օրհնեալ է Յարութիւնը Քրիստոսի:

